

醒

睡

錄

御

醒睡錄初集目錄

人事類

都門瑣事

小甘羅

春明餒鬼

門生反眼

卑職無考人福

貓兒慣偷嘴

禿子前身苦結局

藩司三隻手

知縣能罵總督

殘書拾得升官譜

上海機房

冷金箋

夏姬痴魂

座主羞顏

渠兒應受官刑

鷄子尋骨頭

夫人決策保危城

制府一片心

典史驟擢封疆

小試偏超大比羣

陽痿不舉

陰昂如生

五彩蠶絲爲鋪墊

三擔鯽魚作羹羹

獺貂爲坐褥

錦繡拭肛門

平崇雅奏

訓卒饒歌

百金不足治酖飯

一寶纔能作席工

萬壽宮中作米

大成門內乘輿

英烈抗節

忠義顯靈

天語褒福將

維藩授總戎

上書未竟用附稟啓

格言不果留附士庶去思碑

舐熱屁股

塞冷竈門

栽培寒士

分潤冷官

如忌老子

迂腐先生

奇冤裁舊典

美觀累新骸

宋代忠臣生烈女

唐朝巨族有賢裔

用暗箭掄元

因貸金嫁禍

俊秀二字確鑿

履歷三代糊塗

醒睡錄初集卷六

楚梅鄧文濱南陽布衣渭卿纂輯

人事類

都門瑣事

造物之大何物不生帝世之宏何人不有故生麟鳳龜龍亦生蛇蝎螟
蟻有元愷岳牧亦有工驩苗繇不如此不足見造物之大不如此不足
徵帝世之宏都門爲首善之區宜服教畏神者較勝畿外乃白日大街
無論寒暑有裸身不着寸縷者或三五成羣或數十結黨於街衢分路
處負曝乘涼作仰臥蹲踞欠伸試牌押攤吸烟手談搏戰捉虱搔癢等
態自 變興經過外無論王侯將相搢紳婦女偪近往來毫無顧忌時
而散處則搶掠行人衣冠佩掛帶料及車中什物等件其迅速莫可名
狀身受者驚爲鬼怪南來公車所佩腰眼鏡扇套無一存者咸以爲憑

空飛去每晨黑市山積攤賣多此等物也諸惡少債負多約鄉會試期圖取諸彼以與此故都門有眼鏡春之謠猶農家所謂麥春穀春也搶奪時旁人不敢言言則陰受其害如抉目刳嘴之類本人不宜逐逐則定遭其毒如塗糞撲灰之類巡城御史及守上官皆掩耳盜鈴毫不查拿驅逐或謂中有王侯後裔恐譏而生變也更有深夜明火持刀挂鬚塗面或由屋瓦而來或循涼棚而下絕跡飛行入紳商家劫奪姦淫無所不至凡鄰右喊救者卽罵曰爾些許財不配老子動手趕緊發大財再請老子來其猖狂如此尤奇皇上御殿嚴肅地也辨色時竟有貂服被其割裂朝珠被其戳取者師濟盈廷若盡人搜驗殊爲失體後議朝賀齊集時令闔者守門許入不許出按職各歸本衙朝房互相認識見有偉哉丈夫公然補服蟒袍跣蹠階下無處可歸者卽擢竊漢也搜之果得刀剪數件又九門提督擅兵權者也家亦被劫寶泉局鎔鑄

圍寶所也戊午春有亡命嘯聚數百持鳥鎗刀矛如亞父將軍從天而下劫奪一空敢與兵弁格鬥至日出乃散予在都閱邸報見某王宮某額駙宮屢有盜劫案卽圓明園內青龍橋邊曾獲匪焉亦異事也今宣武門外菜市口無月不梟首示衆洵日日壞船日日有人行船也

上海機房

西人造器咸以法機自運不需人力所造鎗礮極堅利我軍向多於洋商處市用同治丙寅季少基宮保購辦泰西機器仿其製度創局鑄造鎗礮旋經曾文正具奏特廣其址兼造輪船遂擇上海之城南基廣二百餘畝周以繚垣中建廣廈設立廠房置機數座左右夾室咸置小輪巨機上架橫梁下置輪盤繞以皮條聯以通力輪軸軸置鐵條各綴鐵球以通蒸釜火輪旋轉拽動皮條力布四方小輪俱轉凡鋸木截鐵磨鑿之類無不賴焉廠南建公務廳公局房內復有廳事頗宏敞以備

宴客議事有樓面浦可以眺遠東則文案房總庫房又有左庫房爲收藏材料之所公務廳西北有洋鎗樓樓東隙地設露房咸以鉛皮蓋頂以便釘鍋爐配機器其東爲木工廠西卽畫圖房又有熟鐵廠鎔鑄廠重大機器廠廠位船隻廠正東開治平坦廣七十餘丈直出浦江植木爲柱高九丈以便起重又開船塢廣十餘丈袤三十丈有餘旁有屋亦設蒸釜運機則塢水任意放納西則爲木棧東南另造洋房棲西匠去此數百步外比屋如鱗則百工之止息處也已已夏擴地自西南迤邐至東北接連舊址以建書院門外植竹萬竿綠陰蔽道入則重樓傑閣丹檻圍環人各一室有繙譯西文所庚午春遂遷廣方言館於此後有隙地數十畝復建大廠擬添設輪機若火箭廠藥局則相去祇有里許每日匠工多以千計每名日給工食自一二洋至數角不等西匠十餘人工食甚大總辦廠務則撥候補道府一員駐局其經理文案分司各

事者不下數十人現在製造有成者輪船三其他鋼礮洋鎗開花礮火
箭刀箭之類雖域外製度異於尋常規畫究之善事資器而尤待乎人
天下之機可盡乎哉機器妙製略目

輪船 風秤 辟火油 折光鏡 入水泳氣鐘 紡織機器 風

磨 電氣 鑿山機 揚聲接氣筒 蒸氣 照畫 電報 聽肺

木 鐵道火輪車 自鳴鐘 電燈 電礮 煤氣燈 電氣治病

水底火輪 水鏡 天開眼 氣球 風雨表 油井 龍掛

寒暑表 火水 雷魚

小甘羅

甘某天姿英敏名噪文壇髫齡登第時有小甘羅之譽年甫弱冠奉視
學典試差數次門下士以百數居京未婚擬請假歸娶戀一優名寶珠
視若命蓄優舊例三年始出師期末滿得資歸師既滿資僅半名曰幫

師如是者六年則色衰而愛弛矣所得亦無幾甘憐優欲豫贖之非數千金不能自蜀視學歸強力尙能支出師後優自開館買徒蓄優陳設衣服復非數千金不可甘囊已罄頗形竭蹶優亦淡然處之一夕至優館優方應接不暇置甘側室甘負氣歸寓遷怒於僕僕不敢近居院內有巨桐素納涼所也時甚暑扃門戒勿喧僕恐逢怒愈不敢近厥明優至僕曰我大人連日爲君焦灼憊矣方熟睡耳勿驚優闖其戶見桐枝上搖搖如懸旌者則甘某已爲挂角羚羊也其家縛優欲首倡命相知者戒曰似此尙落得乾淨二字若穢行上聞反不能討好遂釋之夫好生惡死人之恒情而不愛生若此致爲名教之罪人以玷辱衣冠讀書何爲哉

冷金箋

某詞曹以書法著名尤工小楷人求之惜墨如金狎一優亦善書優曰

君寫梅村詩集屏壽我此身爲君執箕帚矣欣然許之以冷金箋作四幅繕完昕夕從事無寸晷休稍有一畫不恰意幅雖完猶必易之以此致略血疾其友人謂宜節勞勸而罷之弗聽遂題三字額戲懸其座右曰孝忠齋蓋諷以孝當竭力忠則盡命也彼不悟自若形神銷索強起完之尙欠半幅而氣奄奄絕矣友人檢其篋中見冷金箋近百幅皆屢易而未繕完者也嘆曰有此苦心孤詣而用之不甚愛惜之地尤物之殺人顧若是哉

春明餒鬼

咸豐己未某庶常長沙人父逝祖存家無次丁弱冠登第志得意滿無所不爲在都與余間壁寓時常過從余甚厭之客羨曰其金華殿中神仙乎余笑曰是鐵佛寺內餒鬼耳客曰何謂也余曰一日揮百金不餒何待千斧斫孤木不鬼何爲蓋日宿優而夜宿娼茶館進而酒館出榜

後不百天果亡矣亡時汗血淋漓脫陽於騾車內懷中猶抱一優優卽揭其珊瑚朝珠而去聞其妻兄爲宛平令云四五六等月花銷現銀千兩外欠衣市京蚨一萬有奇欠珠寶市京蚨二萬有奇欠食肆銀肆雜物肆首飾肆京蚨三萬有奇索債者戶外屢滿令曰候其少爺發達來京還各吞聲去閻羅天子果有債還來生之說不知庶常所變何物也死者長已矣堂上二老閨中少婦將若之何諺曰科發少年大不幸是福從而敗之也

夏姬痴魂

道光初年武昌府猾胥某律例熟悉辦命盜案輒能上下其手遂致富年七十退休妻年相當有夏姬行喜倒嫖私一頑童美少年也惡其子婦防閑遂別居及夫還家亦惡之隱與頑童謀置毒於飲食饕之日伴悲傷夜與頑童歡樂極互相嘲謔老嫗曰弄媽起狠心兒安得此便宜

頑童曰非兒下毒手媽安得此快活隣某素與猾胥善見其死太猝早晚頑童往來形迹可疑兼與老嫗同居臥榻僅一板之隔武昌素多板屋也聞此謔語鑿窺之得其注狀憤極曰伊族人首胥身死不明請官相驗並以謔語及壁隙情狀證果毒傷致命官刑訊老嫗供自己造意與童無干童供婆婆不知我自作孽蓋私情固結各甘坐罪不願連累也獄成請令正法嫗凌遲童處斬乘市之日觀者如堵嫗雖白髮肢體肥澤若處女然猶喚劊子手曰從我開刀勿使我目擊兒心傷也童亦云然又相喚曰魂魄皆慢走願結來生緣其痴情如此未識猾胥有知猶能上下其手否

門生反韻

京官習尚每歲春秋佳日本科同年推官階最顯者爲首出知單歛醢費請其座主或房師讌會老師上坐諸門生羅列團拜名曰春秋團兼

請師母如師母世兄弟世嫂世姊妹諸同年婦女中貴顯出色者亦與焉廻樓環繞男居樓下女居樓上朗如列眉置酒上壽不下數十席盃盤羅列珍錯備陳集梨園子弟之最佳者多多益善燈彩輝煌笙歌徹夜酒酣解衣磅礴笑語言歡興盡乃散某部曹最勢利人也初附讌夜半歸來誇耀於人前曰吾今日方知老師之貴也盛哉乎斯世矣老師某相國之子簪纓世胄朱紫盈門科名尤甲一時不數日科場關節案與師門弟子與焉拘繫獄中禍叵測某部曹私往窺探見世兄弟妻孥聚泣老師面如壁土氣奄奄欲絕歸而語其妻曰吾今日大失所望也哀哉不能言矣回念忽喜曰也好也好轉瞬春團又至免我出醺飲銀也諸同年陰相議曰幸子弟無有在京應試者聊免噬臍之悔嗣後渠門不敢再過池魚之殃吾輩能無慮乎昌黎所謂酒食遊戲相徵逐栩栩強笑語以相取下一旦臨利害反眼若不相識落陷阱不一引手援

者此輩是也世態炎涼千古同歎

座主羞顏

帥海門副憲承瀚守正不阿因詞曹三十餘年某科禮闈派監視差時功令嚴懷挾者罪無赦其戚友及世誼子弟遺小書一束屬其僕丁攜入場中帥拒之曰一事苟則其餘皆苟讀書自愛者顧若是耶復示其父兄曰公非所以訓子弟也其座主某相國擅權門下士爭趨附皆致通顯帥獨矯之十餘年不造其門及相國獲罪下獄趨附者恐坐黨交章彈之帥省獄中數次爲獄吏阻不果及謫戍出口帥餞都門外餽重金慰勞相國執手問曰君與某有何交情對曰某科會試門生帥某也訝曰帥某猶在耶老夫負子久矣又某房師卒於都家小幾至流落帥遺資斧送回籍所謂一貴一賤交情乃見一死一生乃見交情

卑職無考人福

玩弄文墨非盛德事亦有足解人頤者某邑令貴州人由進士截取莅
梅意氣昂昂公然以文衡自命下車觀風閱卷無有當意者批粗浮者
亦十有八九堂弟某孝廉代人於月課卷內謔以詩云寅字真支兩韻
收押來何得謂粗浮眼眶太闊胸無有進士如斯恰貴州謔浪笑傲語
極詼諧又駢體文末聯云僕非好行小慧誠有味乎其言之君真見笑
大方何不改夫此度也一時傳爲笑柄及縣試威福自擅有懷挾傳遞
者輒罰跪戒飭帥逸齋觀察遠燁當孝廉時此公造其家自誇考試認
真逸齋笑曰割雞用牛刀何許子之不憚煩足下有生殺權無黜陟柄
如刑名案卷察實情定爰書卽部議不能翻駁之何論司院所謂地頭
文書鐵箍桶也若考試童生嚴弊竇拔真才一郡守得而顛倒之何況
督學所謂終作他人嫁衣裳也設以愚處此隨收隨檢無分甲乙上書
星使曰卑職無考人福不過遵例收卷呈冊而已去取未敢擅便等語

足下以爲何如此公惡然

渠兒應受官刑

某侍郎子恃聲勢而忤鄉曲父沒猶不改乎此度被人控發縣令將刑之某曰看吾父面望勿刑曰爾父何如人曰某部侍郎也縣官曰爾父何在曰沒有年矣令曰爾父既是侍郎不應有此不肖子不刑不足以對侍郎也着加倍懲之予謂此令設侍郎在而刑其子便有氣節聞侍郎沒而加倍以刑猶是災涼態也未若吾鄉某進士子不法縣令刑之其族某副榜邑名宿也因他事詣令令曰昨有不法者不知其爲貴族某進士兒子吾誤刑之幸勿怪某曰既是我家某進士兒子應刑也令問故曰渠父作知縣好刑人家兒子今兒子被人刑亦天道好還也非應刑而何縣令赧然

貓兒慣偷嘴